



“TARAQQIYOT STRATEGIYASI”
MARKAZI

ПРЕСС-РЕЛИЗ

2019 йил 31 май куни Самарқанд шаҳрида “Тараққиёт стратегияси” маркази томонидан Ўзбекистон Республикаси Олий Мажлис Қонунчилик палатасининг Оила ва аёллар масалалари бўйича комиссияси ҳамда ЮСАИД (USAID)нинг Ўзбекистонда суд-ҳуқуқ ислохотлари Дастури ҳамкорлигида тадбир ташкил этилди.

Ўзбекистон Республикаси Президенти томонидан 2019 йил 7 март куни қабул қилинган “Хотин-қизларнинг меҳнат ҳуқуқлари кафолатларини янада кучайтириш ва тадбиркорлик фаолиятини қўллаб-қувватлашга оид қўшимча чора-тадбирлар тўғрисида”ги қарори ижросини таъминлаш мақсадида ўтказилган тадбирда “Эркаклар ва аёллар учун тенг ҳуқуқ ва имкониятлар кафолатлари тўғрисида”ги Ўзбекистон Республикаси Қонуни лойиҳаси муҳокама қилинди.

Муҳокамаларда “Тараққиёт стратегияси” маркази, Ўзбекистон Республикаси Олий Мажлис Қонунчилик Палатаси депутатлари, ЮСАИД (USAID)нинг Ўзбекистонда суд-ҳуқуқ ислохотлари Дастури, Самарқанд вилоят ҳокимлиги ҳамда ОАВ вакиллари қатнашди.

Муҳокамаларни “Тараққиёт стратегияси” маркази Элдор Туляков очди ва олиб борди. У ўз сўзида мамлакатимизда аёл ҳуқуқларини инсон ҳуқуқининг алоҳида ажралмас қисми сифатида эътироф этишнинг тамомила янги даври бошланганини таъкидлади.

У ўз сўзида Ўзбекистон Республикаси Конституциясининг 46-моддасида: «Хотин-қизлар ва эркаклар тенг ҳуқуқлидирлар» - дея эътироф этилиши мамлакатимизда аёллар жамиятнинг фаол аъзоси сифатида барча соҳаларда кенг қамровли иштирок этишининг ҳуқуқий кафолати эканини, аммо бу борада алоҳида яхлит қонун шу пайтгача мавжуд бўлмаганини қайд этди ва эндиликда давлат раҳбари қарори ижросини бажаришда қонун лойиҳасини пишиқ ва пухта ишлаб чиқиш лозимлиги, Самарқанд шаҳрида ўтказилаётган тадбир бунинг учун муҳим аҳамият касб этишига эътибор қаратди. Бундай муҳокама тадбирлари яқин кунлар ичида Бухоро ва Фарғона вилоятларида ҳам ўтказилишини маълум қилди. Шунингдек, очилиш қисмида USAID лойиҳаси директори Гарри Ледбеттер ҳамда Самарқанд вилояти ҳокими ўринбосари, вилоят Хотин-қизлар қўмитаси раиси Гавҳар Алимовалар ҳам сўзга чиқдилар.

Шундан сўнг, қонун лойиҳасини такомиллаштириш мақсадида муҳокама учун иштирокчиларга сўз берилди. Сўзга чиққан Олий Мажлис Қонунчилик Палатаси депутатлари қонун лойиҳасининг ҳозирги ҳолати, уни такомилга етказиш бўйича кўрилаётган чоралар ҳамда қонун лойиҳасининг мазмун-моҳияти хусусида тўхталдилар.

Иштирокчилар “Аёллар ва эркекларнинг тенг ҳуқуқлари ҳамда имкониятлари кафолатлари тўғрисида”ги Қонуннинг қабул қилиниши Гендер тенгликни ҳимоя қилиш бўйича комиссия вазифаларини бажаришга ҳам кўмаклашишини алоҳида таъкидлади. Айти пайтда лойиҳа жамоатчилик муҳокамасини ўтказиш учун Ўзбекистон Республикаси Ягона интерактив давлат хизматлари порталига жойлаштирилгани ҳамда билдирилган фикр-мулоҳаза ва таклифлар асосида такомиллаштирилаётгани маълум қилинди.

Бундан ташқари, жойларда ўтказилаётган муҳокама тадбирлари орқали ушбу лойиҳани янада такомиллаштириш, ҳаётийлигини таъминлаш ва бугунги кундаги мавжуд ижтимоий вазият талабларига тўла мос келишига эришиш мумкинлиги таъкидланди.

Шунингдек, “Хотин-қизларнинг ҳуқуқ ва имкониятларини кенгайтиришнинг қонуний асослари” таҳлил қилиниб, жойларда хотин-қизларнинг тенг ҳуқуқ ҳамда имкониятларини таъминлашдаги мавжуд муаммолар бўйича фикр алмашилди. Уларни самарали ҳал этишнинг ҳуқуқий асосларини ушбу қонунда тўла акс эттиришга қаратилган таклифлар билдирилди. Асосий эътибор, ҳар бир модданинг тўғридан-тўғри амал қилишига эришишга қаратилди.

Қонун лойиҳасини такомиллаштириш бўйича билдирилган барча таклифлар “Тараққиёт стратегияси” маркази экспертлари томонидан умумлаштирилди.

“Тараққиёт стратегияси” маркази Ахборот хизмати